

### □ حزب ست الحبايب □

واحد من الزملا وقاللى انت فى (طش) وقبل ما أجابو راح معكمنى  
ه سجاير. وشوية وجانى واحد تانى وقاللى . إنت معانا فى ( و. ش )  
وراح معكمنى ه سجاير والدنيا اطلوت فى السجن وبقت اخر مزاج.  
ال إيه، جانى الزملا امبارح الصبح وسمعونى محاضرة فى السلوك  
الاشتراكى. وواحد منهم قاللى انت نصاب وخذت السجاير من جميع  
التنظيمات وانت مش فى أى تنظيم .

قلت لهم : وذنبي أنا إيه ؟ كل واحد منكم جانى وقاللى انت فى  
الحزب، انت فى طش، انت مش عارف إيه أنا ماجاوبتش عليكم ولا  
قلت أى كلمة .

وانتو اللي عكمتونى السجاير، أنا طلبت منكم حاجة ! وبالليل  
سهرتو فى العنبر ونصبوا النصبه وعملوا محاضرة عنى وعن سلوكى،  
آل سلوكى آل.

طيب إيه رأيك أنا كنت هاطبق فى رقبه واحد منهم والى يحصل  
يحصل.

وقلت لشوقى أهديء خاطره :

- بس انت اللي غلطان يا شوقى - كان لازم تحدد موقفك .

- هو حد ادانى فرصة أحدد موقفى .

- ماكنتش خدت منهم السجاير .

- يا عم قول يا باسط دا معاهم سجاير تملا عشر دكاكين. ثم

وفيهما إيه لما اخد منهم سجاير، مش همه اللي ودونى فى داهية، مش  
كفاية رقدونى من الوظيفة .

- ما انت اللي غلطان يا شوقى، انت اللي وافقت تنضم لهم .

نظر نحوى نظرة غيظ وقال بصوت مجروح :

- تبقى انت مش مصدقنى. طيب احلفك بإيه ان اللي قلتهولك هوه

اللى حصل، أنا افكرت التيار الثورى حاجة زى الأحرار الدستوريين،